



Jaorverslag 2024:

Overzicht programma 2024:

Op 4 februari was d'r koffiemorgen. Op de eerste koffiemorgen van 2024 waren De Slingetaler Muzikantenwaren te gast. Een good bezochten morgen met een programma van muzieknummers in de streektaal op 't repertoire dee speciaal in-estudeerd waren veur dizzen koffiemorgen.

Op 3 maart was onder grote belangstelling bi-j Den Bremer in Toldiek de start van de Waeke van 't Achterhookse en Liemerse Book. De organisatie van dizzen morgen is in hande van ECAL i.s.m. Vrienden van de Streektaal Lochem en Dialectkring Achterhook en Liemers. Ok wodden hier 't cadeaubeuksken Flonkergood e-presenteerd.

Op 7 april was de afslutende koffiemorgen met Frans Miggelbrink en Henry Welling. Een mooien gemeudeleken morgen. Frans en Henry hadden een geheel ni-j programma emaaft met muziek van Henry Welling en alles wodden good anmekare e-praot deur Frans.

De jaorvergadering met bestuursverkiezing was op 20 april 2024, Maria Stammers was aftraedend en herkiesbaor. Ze werd met applaus herkozen! De kascommissie Gerard Uwland en Ini Obbink hebt laoten weten dat alles d'r good en netjes oetzeet en hebt decharge verleend. Ini Obbink was aftraedend, veur volgend jaor kascommissie Gerard Uwland en een niej lid wodt d'rbi-j evraagd.

Op 4 juli en 1 augustus wazzen d'r weer twee gemeudeleke Kotmansaovende met as veurlaezers Anne Marie Onstenk('t Buurdentjen), Eddy Geurtsen en Louis Veldhuis op den eersten aovend. Herman Riethorst samen met Wilma Beskers, Everdien Koskamp en Ton Toebees op d'n tweeden aovend. De entree veur de aovende was een vri-je gift t.b.v. Stichting 't Schrieverspad.

Op 6 oktober bu'w 't winterseizoen weer begonnen met Dialect op de koffie met als gasten De Knapzakkers. Een programma met muziek en sketches in de streektaal.

Op 26 oktober was de 57^e Dialectdag/Tag des Platt, den wodden ehollene bi-j 't Grachthuys in Bredevoort. Thema was: 'D'r zit muziek in Achterhook en West-Münsterland.' Te gast waren Hans Keuper en Willem te Molder en Georg Bühren en Alexander Buske van Späilwiärk.

Op de koffiemorgen op 8 december waren Hans de Graaf en Hans Hinkamp gastspraekers met een thema in winter-karstsfeer. Ok dit was een gemeudeleken morgen met mooie verhalen.

De Midwinteraovend was op 27 december. Thema was dizze kaere: 'De rieke waereld van Nedersaksische en Platduutse Sprookjes'. Naost de muziek van Goedvolk, waren d'r veudrachten

van Arjan Sterken, Sabine Lukat, Diana Abbink, Doris Homolka. Ondanks de dichte mist was 't een good bezochten morgen.

Op 10 februari en 9 november 2024 waren de schrieversmeddage dee altied deur zo'n 12 töt 15 mensen bezocht wodt.

Taakverdeling en diversen:

In 2024 he'w 7 bestuursvergaderingen ehollen. Daornaost waren d'r op 4 april en op 3 oktober vergaderingen van 't Verbond. Gerard Umland is veurzitter en Maria Stammers penningmeister van 't Verbond. Willemien Smeenk (SOV) is secretaris. Siny Abbink-Grevers (A&L) is lid, net als Ton Toebees (Lochem eu)Maria Stammers is ok notuliste veur 't bestuur A&L.

Ok is d'r een afvaardiging van 't bestuur op 17 januari en 18 september 2024 naor Zelhem ewest umme te vergaderingen met Oldheidkundige Vereniging Salehem in Museum 't Smedekinck te Zelhem. Op 10 november 2024 is gezamenlijk met de Oldheidkundige Vereniging Salehem en de Dialectkring een Dialectmeddag in 't Smedekinck te Zelhem organisaerd, te gast was Gerda Marsman. "t Was helen gezellegen meddag en veur herhaling vatbaor. Deurdat de daotem van festival Plat Gespöld deur omstandigheden was verzet naor een eerderen daotem(ok 10 november) veel dit evenement samen met de Dialectmeddag. Dit festival was helemaole oetverkocht en met optraedens van jong - en older talent met muzieknimmers in de streektaal. Daordeur mos 't bestuur zich verdelen ovver beide evenementen. Ok was een afvaardiging van de Dialectkring Achterhook en Liemers meermaols anwezig bi-j vergaderingen vanoet Stichting Historische Kring Kotten en andere partijen i.v.m. 't plan umme een Meister Meinendag te organiseren in 't naojaor van 2024, helaas is kon den dag neet deurgaon.

Veur de Dialectkring Achterhook en Liemers zit Else Klomps oet Wenters in de redaktie van de Moespot, waarbi'j ze ondersteund wordt deur Dini van der Kolk-van Loo.

Gerard en Ine Umland, hoowal gin lid meer van 't bestuur, zorgt altied nog veur de verzending van de Moespötte en 't actueel hollen van 't jaorprogramma, als ok veur een stapel actuele, strak-gevouwen jaorprogramma-beukskes bi-j elk evenement. Dat is hatstikke fijn! En daor bu'j heel arg bli-j met en eur dankbaor veur.

De Dialectkring hef een verlichtingsset van 4 lampen op statieven veur de koffiemorgens an-eschaft. Daordoor bunt ok achterin de zale de gastspraekers good te zeene. Johan Eppink en Joop Lammers zorgt veur de opbouw van de verlichting bi-j 't podium. Ok laest verschillende bestuursleden veur in de streektaal bi-j verscheidene gelaegenheden. Enkele bestuursleden geeft ok 'Wiesneuslessen' op basisscholen.

Op zondag 28 april ontvingen wi-j 't verdretige bericht dat Ruud Hamburger is overlaene. Ruud , hoowal hee zelf gin dialect sprak, was 10 jaor lang een groten steun veur ons bestuur. Ruud Hamburger had samen met partner Ineke Wezenaar 't beheer ovver de beukewinkel, en Ruud beheerden ok de webstae van de Dialectkring en de Stichting Schrieverspad. Daornaost was hee de fotograaf en maken hee filmpjes van bi-jnao alle evenementen van de Kring en bi-jveurbeeld ok van Plat Gespöld en van 't Waaketreffen. Hee was heel secuur in zien wark en dee d'r alles an umme de Dialectkring good zichtbaor te maken. Daor bunne wi-j Ruud en zien partner Ineke dan ok heel dankbaor veur wat ze allemaole veur onze vereniging en de streektaal edaone hebt!

Nao 't plotselinge overlieden van Ruud is de beukeveurraad op-ehaald bi-j Ineke. De beuke in consignatie bunt terugge naor de schrievers. Veurraad oldere beuke bunt kadopakketten van emaaft met mooie prieskes van €5,- en €10,- per pakket, dee bi-j koffiemorgen en Midwinteraovend an 't ende van 't jaor verkocht wodden en ok bunt d'r wat pakketten veur winnaars van streektaalquiz op Slingeland Fm ter beschikking esteld. Vanaf mei hef Jochem Bronzewijker veur de Dialectkring de webstae tiedeleks können anvullen en bi-jhollen. Waorveur wi-j 'm heel dankbaor bunt!

In 't ni-je jaor is de bedoeling da'w 't binnen de vereniging probeert op te vangen. De foto's van de latere evenementen van 't jaor bunt emaaft deur Janette van Egten. De andere taken bunt verdeeld onder de bestuursleden.

Diana Abbink warkt ok veur Erfgoedcentrum Achterhoek en Liemers en zit ok onder andere in het bestuur van de warkgroep Achterhoek-Westmünsterland. Ze kan daordeur veur völle zaken verbindende schakel wezen. Ok hef Diana samen met Ria Olijslager een streektaal-radioprogramma bi-j Slingeland Fm en een dialectquiz op televisie van Slingeland Fm. Ok Gerard Uwland hef een streektaalradio-programma op Slingeland Fm en Ine Uwland zorgt veur de techniek/ knöppe van 't programma. De programma's kent völle luusteraars.

Wieter nog:

In 2024 bunt d'r deur de kindere van Willem Wilterdink twee deuzen met beuke in de streektaal ter beschikking e-steld veur de leden en belangstellenden van de Dialectkring en streektaal in 't algemeen. Dizze deuzen bunt op beide Kotmansaovende (4 juli en 1 augustus 2024) neer ezet en daar konnen de bezoekers beuke oetzeuken. D'r was völle belangstelling veur. Nogmaols dank an de familie Wilterdink.

Ok is d'r een book van 'Het Dialect van Winterswijk' geschonken an Diana Abbink veur de Dialectkring deur de heer Langenhorst. Waorveur ok unze harteleden dank.